

CONVENIO DE COOPERACIÓN EDUCATIVA ENTRE A UNIVERSIDADE DA CORUÑA, A UNIVERSIDADE DE SANTIAGO DE COMPOSTELA, A UNIVERSIDADE DE VIGO E O INSTITUTO GALEGO DE ESTATÍSTICA PARA REALIZAR PRÁCTICAS ACADÉMICAS EXTERNAS DO ESTUDANTADO DE TODOS OS MESTRADOS INTERUNIVERSITARIOS DO SISTEMA UNIVERSITARIO DE GALICIA

REÚNENSE

Don Ricardo José Cao Abad, Reitor magnífico da Universidade da Coruña, que actúa en nome e representación desta entidade en virtude do nomeamento como reitor segundo o Decreto 1/2024, do 11 de xaneiro (DOG nº 10, do 15 de xaneiro), de acordo coas competencias que lle outorgan o artigo 50 da Lei Orgánica 2/2023, do 22 de marzo, do Sistema Universitario e o artigo 36.1.f) dos Estatutos da Universidade da Coruña, aprobados polo Decreto 101/2004, do 13 de maio, (DOG nº 100, do 26 de maio) e modificados polo Decreto 194/2007, do 11 de outubro (DOG nº 201, do 17 do outubro).

Don Antonio López Díaz, Reitor magnífico da Universidade de Santiago de Compostela, que actúa en nome e en representación desta entidade en virtude do nomeamento como reitor segundo o Decreto 35/2022, do 17 de marzo (DOG nº 56, do 22 de marzo), de acordo coas competencias que lle outorgan o artigo 50 da Lei Orgánica 2/2023, do 22 de marzo, do Sistema Universitario e o artigo 85.g) dos Estatutos da Universidade de Santiago de Compostela, aprobados polo Decreto 14/2014, do 30 de xaneiro (DOG nº 29, do 12 de febreiro).

Don Manuel Joaquín Reigosa Roger, Reitor magnífico da Universidade de Vigo, que actúa en nome e en representación desta entidade en virtude do nomeamento como reitor segundo o Decreto 110/2022, de 9 de xuño (DOG nº 117, do 20 de xuño), de acordo coas competencias que lle outorgan o artigo 50 da Lei Orgánica 2/2023, do 22 de marzo, do Sistema Universitario e o artigo 29.i) dos Estatutos da Universidade de Vigo, aprobados polo Decreto 13/2019, do 24 de xaneiro (DOG nº 38, do 22 de febreiro).

E Don José Antonio Campo Andión, Director do Instituto Galego de Estatística, que actúa en nome e representación desta entidade en virtude do nomeamento como director segundo o Decreto 295/2009, do 14 de maio (DOG nº 94, do 15 de maio), de acordo coas competencias que lle outorgan o artigo 41 da Lei 9/1988, do 18 de xullo, de estatística de Galicia e o artigo 15.2.n) do Estatuto do organismo autónomo Instituto Galego de Estatística, aprobado por Decreto 60/2016, do 26 de maio (DOG nº 108, do 8 de xuño).

Todas as partes recoñécense plena capacidade e lexitimación abonda para a formalización do presente convenio e, para estes efectos,

EXPOÑEN

1. Que a adecuación dos programas educativos ás necesidades do mundo empresarial constitúe unha das preocupacións das universidades galegas.
2. Que o complemento para formar ao estudiantado que supón o coñecemento da realidade empresarial no ámbito das ensinanzas teóricas impartidas é un dos obxectivos que as universidades do Sistema Universitario de Galicia consideran de maior importancia.

3. Que entre as tarefas encomendadas ao Instituto Galego de Estatística nos plans anuais de actuación previstos no seu Estatuto figuran as prácticas do estudantado universitario, que se realizarán respectando a Lei 9/1988, do 19 de xullo, de estatística de Galicia e como actuacións complementarias das reguladas na Lei 16/2021, do 20 de decembro, do Plan galego de estatística 2022-2026. Neste plan contémpanse ademais como obxectivos instrumentais o de realizar investigación estatística e o de cooperar coa comunidade científica e con outras institucións para mellorar métodos e procedementos.

4. Que todas as partes consideran necesario un maior achegamento entre o ámbito empresarial e as universidades, co obxecto de facilitar a futura inserción laboral dos universitarios e universitarias mediante a alternancia da súa formación teórica con prácticas de empresa, para acadar o mesmo tempo a mellor cualificación e a futura adaptación aos postos de traballo demandados polas empresas.

5. Todo isto evidencia a necesidade dun convenio que enmarque a cooperación educativa entre as entidades asinantes e delimite as garantías recíprocas do estudantado e o IGE no desenvolvemento do período de prácticas.

Polo anteriormente exposto, acordan asinar este convenio de colaboración que se rexerá polas seguintes

CLÁUSULAS

Primeira. Obxecto

O presente convenio ten por obxecto establecer un marco de colaboración entre as partes asinantes co fin de levar a cabo conxuntamente a formación práctica externa do estudantado no campo propio de calquera dos mestrados interuniversitarios do Sistema Universitario de Galicia (en diante SUG), e que se realizarán nas instalacións do Instituto Galego de Estatística (en diante IGE).

As partes asinantes acordan establecer un programa recíproco para a realización de prácticas, así como achegar persoas expertas para impartir a docencia teórico-práctica especializada que fose precisa.

A través do presente convenio fíxanse as pautas e os mecanismos de colaboración entre as partes coa finalidade de establecer unha adecuada programación, desenvolvemento e verificación da colaboración, que se materializará mediante a sinatura dos correspondentes proxectos formativos acordados entre as universidades, e que serán asinados polo titor ou titora académica que designe a universidade de orixe, o titor ou titora que designe o IGE e o/a estudante en prácticas.

Segunda. Convocatoria e oferta de prácticas

As prácticas convocaranse por cada unha das universidades de orixe segundo a normativa de prácticas respectiva. A oferta concreta de prazas será determinada por acordo dos órganos con competencias en cada unha das universidades de conformidade coa proposta do IGE, e establecerase como criterio xeral que a oferta sexa equilibrada entre as tres universidades.

Poderá participar nas prácticas o alumnado do mestrado interuniversitario do SUG para o que se ofrezan. A realización efectiva das prácticas poderá exceder o período ordinario do curso académico respectando o límite establecido por cada universidade.

Terceira. Duración, horario, réxime de permisos e condicións de resolución anticipada das prácticas

1. A duración das prácticas será a seguinte:

- a) As prácticas externas curriculares terán a duración establecida no plan de estudos correspondente e antes de inicialas o/a estudante ten que estar matriculado/a e non ter depositado o título, nos termos establecidos polo artigo 14.5 do Real Decreto 822/2021, do 28 de setembro, polo que se establece a organización das ensinanzas universitarias e do procedemento de aseguranza da súa calidade.
- b) As prácticas externas extracurriculares terán unha duración non superior ao cincuenta por cento do curso académico, e axustarase en todo caso á normativa da universidade de orixe.

2. Os horarios de realización das prácticas estableceranse de acordo coas súas características e coa dispoñibilidade do IGE. Deberán ser compatibles coa actividade académica, formativa e de representación e participación desenvolvida polo/a estudante na universidade de orixe.

3. O réxime de permisos acordarase entre o IGE e cada estudante e deberá adaptarse ás normas que a universidade de orixe poida establecer. En todo caso, respectaranse por parte do IGE as obrigas derivadas do cumprimento da actividade académica e formativa, así como de representación e de participación do alumnado.

4. A persoa estudante que incumpra as actividades definidas no proxecto formativo ou as directrices marcadas polo/a tutor/a do IGE poderá ser excluída das prácticas académicas. Neste caso, o IGE comunicarlle á universidade de orixe esta circunstancia e, de común acordo, ambas as entidades darán por finalizada anticipadamente a realización da práctica externa coa perda dos dereitos formativos e, no seu caso, económicos que lle correspondesen á persoa beneficiaria.

No caso de que as prácticas no IGE non se axusten ao acordado coa coordinación do título, poderá ser motivo de rescisión delas. Nestes casos, a comisión de seguimento ou o órgano competente ofrecerá unha solución para completar o período que lle reste ao/a estudante para finalizar as prácticas.

Así mesmo, cada estudante en prácticas poderá, por causas xustificadas, solicitar a renuncia a elas, o que resolverá a vicerreitoría ou o órgano con competencias na materia de prácticas académicas externas na universidade de orixe.

Cuarta. Proxecto formativo das prácticas

O proxecto formativo no que se concretará a realización das prácticas académicas externas fixará os obxectivos educativos e as actividades que se vaian desenvolver. Os obxectivos estableceranse considerando as competencias básicas, xenéricas, específicas e transversais que debe adquirir cada estudante. Así mesmo, os contidos das prácticas definiranse de forma que aseguren a relación directa das competencias

adquiridas cos estudos cursados. Este proxecto formativo reflectirase nos modelos que ao respecto da formalización da práctica teña a universidade de orixe do/a estudante en prácticas.

Quinta. Vinculación do alumnado en prácticas co IGE

1. A relación do alumnado en prácticas co IGE non terá en ningún caso carácter laboral e, polo tanto, non se poderá acoller a ningunha modalidade contractual laboral das previstas no Estatuto dos Traballadores.
2. As actividades estarán sempre orientadas á aprendizaxe, polo que o alumnado en prácticas non poderá realizar tarefas de responsabilidade no IGE, nin as propias e exclusivas do seu persoal.
3. O IGE non poderá cubrir coa persoa estudante en prácticas ningún posto de traballo, nin sequera con carácter eventual ou interino.
4. Durante o período de prácticas o alumnado non poderá manter ningunha relación contractual coa empresa, institución ou entidade pública ou privada ou coa propia universidade na que se vaian realizar as prácticas, salvo autorización conforme á normativa interna de cada universidade.

Sexta. Aseguramento do alumnado e responsabilidade civil

1. A realización de prácticas académicas externas estará cuberta polo seguro escolar. A cobertura para o alumnado maior de 28 anos correrá pola conta do estudante, sempre e cando a universidade de orixe non posúa un seguro de accidentes que lles dea cobertura.
2. Os danos a terceiros como consecuencia da realización de prácticas académicas externas do/a estudante estarán cubertos polo seguro de responsabilidade civil da universidade de orixe. Non obstante, no caso de prácticas nas que concorran riscos excepcionais ou outras circunstancias, poderán contratarse seguros adicionais cuxo custo correrá pola conta do/a estudante.

Sétima. Inclusión no sistema da Seguridade Social do alumnado

1. A inclusión no réxime xeral da Seguridade Social do estudiantado que realice prácticas académicas externas rexerase polo establecido na disposición adicional quincuaxésima segunda do Texto Refundido da Lei xeral da Seguridade Social introducida polo artigo único, parágrafo 34, do Real Decreto-Lei 2/2023, do 16 de marzo, e polo desenvolvemento normativo establecido pola Tesourería Xeral da Seguridade Social. A realización de prácticas externas curriculares ao amparo do presente convenio determinará a inclusión no sistema da Seguridade Social das persoas que as realicen, que quedarán comprendidas como asimiladas a traballadores por conta allea no Réxime Xeral da Seguridade Social.

UNIVERSIDADE DA CORUÑA

Das prácticas externas curriculares e extracurriculares non se derivarán os deberes propios dun contrato laboral e tampouco terán ningunha dotación económica por parte do IGE.

Por tratarse de prácticas externas non remuneradas, a Universidade da Coruña asumirá a cotización e a tramitación do alta dos/as estudantes en tanto se manteña en vigor a Disposición Adicional 52ª do Texto Refundido da Lei xeral da Seguridade Social introducida polo artigo único, parágrafo 34, do Real Decreto-Lei 2/2023, de 16 de marzo.

O IGE poderá interromper as prácticas cando considere que o alumnado vulnerou gravemente os seus deberes, o que lle comunicará á persoa que fose designada como titora por parte do centro da Universidade da Coruña.

UNIVERSIDADE DE SANTIAGO DE COMPOSTELA

Por tratarse de prácticas externas non remuneradas e para o alumnado de orixe desta universidade, o cumprimento das obrigas da Seguridade Social corresponderalle á Universidade de Santiago de Compostela, que asumirá a condición de empresario e deberá comunicar os días efectivos de prácticas a partir da información que lle facilite o IGE.

UNIVERSIDADE DE VIGO

Por tratarse de prácticas externas curriculares non remuneradas, a responsabilidade do cumprimento das obrigas en materia de Seguridade Social será da Universidade de Vigo.

2. A Universidade de orixe do alumnado garantirá o cumprimento do establecido no punto anterior para cada un dos alumnos/as que, en base a este convenio, sexan autorizados polo IGE para a realización de prácticas nas súas instalacións.
3. Esta cláusula será de aplicación para todo o alumnado que realice prácticas externas ao amparo deste convenio a partir do 1 de xaneiro de 2024.

Oitava. Dereitos e deberes do alumnado

O alumnado en prácticas terá dereito a contar cunha persoa titora externa no IGE e cunha persoa titora académica da universidade de orixe.

O alumnado en prácticas terá dereito:

- a) A ser avaliado no desenvolvemento das súas actividades segundo o establecido no programa. A avaliación referirase á consecución dos obxectivos de formación, que serán coñecidos pola persoa titora do IGE. O alumnado terá dereito a coñecer os criterios de avaliación.
- b) Á imputación dos créditos cursados para os efectos de finalización de estudos no caso das prácticas curriculares, sempre que contén coa avaliación positiva do seu período de prácticas. No caso das prácticas extracurriculares, dereito a que a universidade de orixe acredite as prácticas realizadas e as faga constar no expediente e no Suplemento Europeo ao Título, sempre que contén coa avaliación positiva e se realicen antes de rematar os estudos.
- c) Á expedición, por parte do IGE, unha vez finalizado o período de prácticas con avaliación positiva, dunha certificación con mención expresa do nivel acadado na realización das prácticas e con indicación da especialidade á que estivo orientada a súa formación, de ser o caso.

- d) A recibir, por parte do IGE, información da normativa de seguridade e de prevención de riscos laborais
- e) A cumprir coa súa actividade académica, formativa e de representación e participación, tras comunicarllo con antelación suficiente ao IGE.
- f) A dispoñer dos recursos necesarios para o acceso do alumnado con discapacidade á tutela, á información, á avaliación e ao propio desempeño das prácticas en igualdade de condicións.
- g) A conciliar, no caso de estudantes con discapacidade, a realización das prácticas coas actividades e situacións persoais derivadas ou conectadas coa situación de discapacidade.
- h) Aos outros dereitos previstos na normativa vixente.

Así mesmo, terán os dereitos establecidos no Real Decreto 592/2014, do 11 de xullo, polo que se regulan as prácticas académicas externas dos estudantes universitarios, no Real Decreto 1791/2010, do 30 de decembro, polo que se aproba o Estatuto do estudante universitario, e nos Estatutos da Universidade de Santiago de Compostela, da Universidade de Vigo e da Universidade da Coruña.

Durante o período de prácticas, o alumnado deberá desenvolver o proxecto formativo e elaborar unha memoria final e, de ser o caso, un informe intermedio.

Con relación ao IGE, os/as estudantes deberán:

- a) Incorporarse na data acordada e cumprir o horario previsto no proxecto formativo.
- b) Cumprir e respectar o sistema organizativo do IGE.
- c) Gardar o debido coidado respecto dos asuntos que coñezan na súa tarefa.
- d) Cumprir e respectar as normas de seguridade e de prevención de riscos laborais do IGE.
- e) Cumprir con dilixencia e boa fe as actividades acordadas co IGE.
- f) Calquera outro deber previsto na normativa vixente.

O alumnado de prácticas curriculares estará obrigado a realizar a totalidade de créditos dos que estean matriculados de acordo co establecido no plan de estudos para obter o recoñecemento académico.

O incumprimento das súas obrigas poderá determinar a perda automática dos seus dereitos como estudante en prácticas, sen prexuízo das accións disciplinarias que procedan.

Novena. Titorización das prácticas

A cada estudante asignaráselle unha persoa titora académica que será docente da titulación e designada pola universidade de orixe para cada práctica ofertada, coa misión de facer un seguimento máis directo desta, darlles resposta ás expectativas formativas establecidas, asegurar o seu correcto desenvolvemento e avalialo/a de acordo co proxecto formativo e o programa ou guía docente da materia. A persoa titora académica tamén será responsable de avaliar o alumnado en prácticas externas curriculares conforme os criterios de avaliación fixados e segundo o procedemento de avaliación establecido pola universidade de orixe.

Cada estudante contará tamén cunha persoa titor externa no IGE, que será responsable de aplicar o plan de formación previsto e de elaborar os informes de valoración que se lle soliciten sobre o traballo desenvolvido polo/a estudante.

Décima. Dereitos e obrigas doas persoas titoras

A. A persoa titora do IGE terá dereito:

1. Ao recoñecemento da súa actividade colaboradora por parte da universidade por solicitude das persoas interesadas.
2. A ser informada sobre o regulamento de prácticas académicas externas.
3. A ser informada sobre o proxecto formativo e as condicións do seu desenvolvemento.
4. A obter a información e o apoio necesarios para cumprir os fins propios da súa función.

B. A persoa titora do IGE terá os seguintes deberes:

1. Acolloer ao/á estudante e organizar a actividade que se desenvolverá consonte o establecido no proxecto formativo.
2. Supervisar as súas actividades, orientar e controlar o desenvolvemento da práctica cunha relación baseada no respecto mutuo e no compromiso coa aprendizaxe.
3. Informar ao/á estudante da organización, do funcionamento do IGE e da normativa de interese, especialmente da relativa á seguridade e riscos laborais.
4. Coordinar coa persoa titora académica da universidade de orixe o desenvolvemento das actividades establecidas no convenio, que terán en conta:
 - As modificacións do plan formativo que poidan ser necesarias para desenvolver a práctica.
 - A comunicación e a resolución das incidencias que poidesen xurdir.
 - O control de permisos para realizar exames ou outro tipo de actividades de carácter académico.
5. Emitir o informe final e, de ser o caso, o informe intermedio.
6. Proporcionar a formación complementaria que precise o/a estudante para realizar as prácticas.
7. Proporcionarlle ao/á estudante os medios materiais indispensables para desenvolver as prácticas.
8. Facilitar e estimular a achega de propostas de innovación, mellora e emprendemento por parte do/a estudante.
9. Facilitarlle á persoa titora académica da universidade o acceso ao IGE para cumprir os fins propios da súa función.



10. Gardar confidencialidade en relación con calquera información coñecida do/a estudante como consecuencia da súa actividade como titor/a.
11. Prestarlle axuda e asistencia ao/á estudante durante a súa estadía no IGE para resolver as cuestións de carácter profesional que poida necesitar no desempeño das actividades que realiza.

C. A persoa titora académica da universidade de orixe terá os seguintes dereitos:

1. Ao recoñecemento efectivo da súa actividade académica, sen que do devandito recoñecemento se poidan derivar en ningún caso efectos retributivos específicos.
2. A ser informada verbo do regulamento de prácticas académicas externas, así como do proxecto formativo e das condicións baixo as que se desenvolverá a estadía do/a estudante que debe tutelar.
3. A ter acceso ao IGE para cumprir os fins propios da súa función.

D. A persoa titora académica da universidade de orixe terá os seguintes deberes:

1. Velar polo normal desenvolvemento do proxecto formativo, garantindo a compatibilidade do horario das prácticas coas obrigas académicas, formativas, de representación e participación do/a estudante.
2. Facer un seguimento efectivo das prácticas en coordinación coa persoa titora do IGE, e vistos os informes de seguimento, no seu caso.
3. Autorizar as modificacións que se produzan no proxecto formativo.
4. Avaliar as prácticas da persoa estudante titorizada de acordo co establecido no regulamento de prácticas académicas externas da universidade de orixe.
5. Gardar confidencialidade sobre a información coñecida como consecuencia da súa actividade como titor/a.
6. Informar o/a responsable das prácticas académicas externas na universidade de orixe das posibles incidencias xurdidas.
7. Supervisar e, de ser o caso, solicitar a adecuada disposición dos recursos de apoio necesarios para asegurar que os/as estudantes con discapacidade realicen as súas prácticas en condicións de igualdade de oportunidades, non discriminación e accesibilidade universal.

Undécima. Memoria das prácticas

Ao rematar o período de prácticas cada estudante deberá realizar, polo menos, unha memoria final sobre o traballo desenvolvido e entregarlle á persoa titora académica. O seu contido mínimo axustarase ao establecido no regulamento de prácticas académicas externas da universidade de orixe.

Duodécima. Procedemento de avaliación

A persoa titora académica, á vista do informe da titora do IGE e da memoria final do/a estudante, avaliará as prácticas desenvolvidas cubrindo o correspondente informe de valoración.

Décimo terceira. Certificación do IGE

No caso de que a avaliación da memoria e o informe de actuación da persoa estudante sexan favorables, o IGE emitirá para cada estudante unha certificación na que deberán constar o tempo de colaboración e as actividades, os traballos, as investigacións etc., realizados.

A certificación emitida deberá especificar que carecerá de efectos académicos e que quedará supeditada á avaliación que realice a universidade de orixe das prácticas realizadas.

Décimo cuarta. Efectos das prácticas

A realización das prácticas curriculares polo alumnado computará para obter os títulos correspondentes co carácter establecido no plan de estudos.

No caso das prácticas extracurriculares, estas non formarán parte do plan de estudos, pero figurarán no expediente e no Suplemento Europeo ao Título, sempre que se realizasen antes de finalizar os estudos.

Décimo quinta. Protección de datos

As partes comprométese a tratar os datos persoais necesarios para executar o presente convenio de conformidade co disposto no Regulamento (UE) 2016/679, do Parlamento Europeo e do Consello, do 27 de abril de 2016, relativo á protección de datos das persoas físicas no que respecta ao tratamento de datos persoais e á libre circulación destes datos (RXPD), e na Lei orgánica 3/2018, do 5 de decembro, de protección de datos persoais e garantía dos dereitos dixitais (LOPDGDD), así como co resto da lexislación española aplicable nesta materia.

De conformidade coa lexislación, o alumnado en prácticas que por razón das actividades formativas acceda, en calquera fase do tratamento, a datos de carácter persoal, non lles revelará a persoas alleas ao IGE ningunha información nin utilizará ou dispoñerá dela con finalidade distinta á esixida polas accións formativas. Esta obriga subsistirá aínda despois de rematar as prácticas e no caso de incumprir o deber de segredo o/a estudante responderá fronte ao IGE, sen prexuízo das responsabilidades que por igual causa se puidesen derivar ante a Axencia Española de Protección de Datos.

O estudante en prácticas tamén quedará sometido a cumprir a normativa sobre segredo estatístico contemplada na Lei 9/1988, do 19 de xullo, de estatística de Galicia e, para tal efecto, asinará un documento antes de iniciar a súa estadía no IGE.

Os ficheiros automatizados nos que se sometan a tratamento datos persoais de estudantes, persoal do IGE ou outros/as participantes nos programas de prácticas académicas externas deberán respectar a lexislación e a normativa da universidade de orixe sobre protección de datos de carácter persoal e aplicar as medidas de seguridade que correspondan.

As partes exonéranse mutuamente de calquera responsabilidade que se xerase polo incumprimento por unha delas das obrigas derivadas da normativa de protección de datos persoais.

Décimo sexta. Comisión de seguimento

Créase unha comisión de seguimento do presente convenio integrada por parte das universidades asinantes polo vicerreitor ou vicerreitora con competencias en materia de prácticas académicas, ou persoa en quen delegue, e por parte do IGE pola persoa que esta designe. A comisión de seguimento terá as seguintes competencias en relación coas prácticas tuteladas:

1. Resolver os problemas que se susciten na súa execución.
2. Interpretar e aplicar, con carácter xeral, as estipulacións deste convenio, así como controlar o seu cumprimento e resolver os conflitos entre as partes.
3. Tomar medidas en relación coas incidencias xurdidas na realización das prácticas, incluída a expulsión de estudantes que incumpran as cláusulas do convenio.

A comisión reunirse cando así o considere necesario calquera das partes.

Décimo sétima. Normas de aplicación supletorias

Á falta de determinación no convenio aplicaranse as seguintes normas:

- Real Decreto 822/2021, do 28 de setembro, polo que se establece a organización das ensinanza universitarias e do procedemento de aseguranza da súa calidade.
- Real Decreto 592/2014, do 11 de xullo, polo que se regulan as prácticas académicas externas dos estudantes universitarios.
- Normativa de prácticas académicas externas das universidades asinantes.
- Normativa do plan de estudos da titulación.

Décimo oitava. Vixencia do convenio

O convenio terá efectos desde a súa sinatura e a súa duración será de catro anos e, en calquera caso, polo tempo que duren as prácticas do alumnado. O convenio poderá prorrogarse de forma expresa para os seguintes catro anos de común acordo polas partes e en tanto non se denuncie expresamente, como mínimo con tres meses de antelación. En todo caso, non se poderá rescindir mentres existan estudantes realizando prácticas.

Décimo novena. Resolución do convenio

Serán causas de resolución do convenio:

- a) O mutuo acordo das partes.
- b) O incumprimento das cláusulas contidas nel, logo da reunión da comisión de seguimento.

A denuncia do convenio poderá realizala calquera das partes e comunicarse por escrito coa antelación establecida na cláusula décimo oitava. Unha vez extinguido o convenio, deberá asegurárselle ao alumnado que está desenvolvendo as actividades formativas obxecto deste acordo a posibilidade de finalizalas.

Vixésima. Xurisdición

As partes comprométense a resolver amigablemente as diferenzas que puidesen xurdir a través da comisión de seguimento.

Non obstante, recoñécese a xurisdición contencioso-administrativa como competente na materia, dada a natureza pública das universidades e do IGE.

Vixésimo primeira. Publicidade

A sinatura do convenio leva implícito o consentimento expreso das persoas intervinientes para que a Administración pública autonómica galega poida facer públicos os datos de carácter persoal e calquera outras especificacións que figuren nel, de acordo co disposto na Lei 19/2013, do 9 de decembro, de transparencia, acceso á información pública e bo goberno e na Lei galega 1/2016, do 18 de xaneiro, de transparencia e bo goberno. O convenio será inscrito no rexistro de convenios da Xunta de Galicia, nos termos previstos no Decreto 126/2006, do 20 de xullo.

A sinatura deste convenio deixa sen efecto o convenio de cooperación educativa entre a UDC, a USC, a UVIGO e o IGE para realizar prácticas académicas externas do estudiantado do todos os mestrados interuniversitarios do sistema universitario de Galicia, asinado con data do 26 de setembro de 2024.

En proba de conformidade, as partes asinan este convenio na data da última sinatura electrónica.

Universidade da Coruña
O Reitor
Ricardo José Cao Abad

Universidade de Santiago de Compostela
O Reitor
Antonio López Díaz

Universidade de Vigo
O Reitor
Joaquín Reigosa Roger

Instituto Galego de Estatística
O Director
José Antonio Campo Andión.